



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguaintas fatschendas:

Festa pro'l lai da Pradella

Üna firma indigena ha inoltrà üna dumonda per far üna festa pro'l lai giò Pradella dals 29 lügl fin e culs 1. avuost 2011. Previs esa d'installar ün uschèdit "Wakeboardlift", ün indriz per traversar il lai vi d'üna sua chi vain tratta d'ün motor electric. Il cussagl ha decis da dar ün permiss per ün'unica jada cun diversas cundiziuns. Tanter oter ston preschantar ils organisateurs ün concept da sgürezza ed ün concept da parcar. Il cumün sco eir las Ouvras electricas refüsan tuotta respunsabilità per eventuels accidaints.

CSEB: cunvegna da prestaziun

La nouva finanziaziun da la chüra pretenda üna nouva cunvegna da prestaziun tanter il CSEB e'ls cumüns d'Engiadina Bassa. Il cussagl cumünal ha approvà quista cunvegna.

Chantröven o Porta: lavuors da sanaziun

Il cussagl ha decis da far quist on la sanaziun da la segunda etappa da Porta (provedimaint d'aua/chanalisaziun) e da spostar las lavuors pella via da Chantröven. Quel proget dess gnir tut per mans ün dals prossems ons in coordinaziun culs progets privats chi sun previs in vicinanza da la via da Chantröven.

PQ Pütvia-Sotchà

Il cussagl ha approvà e deliberà il plan da quartier Pütvia-Sotchà pell'inscripziun aint il register fundiari.

Plan da quartier Sachs

Cunter il nouv perimeter dal plan da quartier Sachs (areal da la posta) es entrà ün recuors. Il cussagl cumünal ha decis da refüsar quist recuors.

Via d'Engiadina, attach Nairs

L'uffizi da construcziun bassa ha l'intenziun da surdar al cumün da Scuol l'attach Nairs vi da la via d'Engiadina fin giò e culla mità da la punt sur l'En. Il cussagl cumünal es da l'avis cha la punt dess gnir surtutta plainamaing dal cumün da Tarasp, siond ch'ella serva be plü sco acces pella büvetta da Tarasp, il stabilimaint da la funtana Carola e l'areal da las anteriuras plazzas da tennis. L'attach a la via d'Engiadina dess gnir survaglià e mantgnü tenor l'idea dal cussagl cumünal be dal Chantun cunquai ch'el vaglia sco üna unità da construcziun.

L'anteriura via chantunala tanter l'attach Nairs e Scuol (Via veglia da Brentsch) dess gnir surdatta al cumün tenor üna cunvegna suottascritta fingià dal 2007. Davo cha quist duos müdamans saran suot tet, resta pendent be amo la surdatta da la via veglia da Sent da la Villa Patria fin sü pro'l mür da l'anteriur suotpassagi. Il cumün vess gugent cha'l chantun spordschess man per surdar bainbod eir quist traget.

Parkegi sün parcella 29 (Ospidal)

La CSEB vaiva fat la dumonda per ün müdamaint da zona sün parc. 29 (parcella dasper la senda da Chauennas vidvart l'Ospidal) per pudair drizzar aint là plazzas da parcar. Quist terrain es actualmaing illa zona agricula, da prada sütta e da protecziun da la cuntrada cultivada. El ha servi dūrant il temp da fabrica da l'ospidal passagermaing sco parkegi pella mansteranza.

Il cussagl cumünal ha decis da refüsar quista dumonda. El es da l'avis cha ün parkegi definitiv in quel lö nu füss ün bel aspet pellas numerusas persunas chi van a spass sün quella via champestra. L'access per quist parkegi sülla via champestra füss eir massa stret e stuveess gnir fabrichà oura. Ün argumaint important es eir cha l'Ospidal es accessibel fich bain cul trafic public e cha las plazzas da parcar chi sun avant man (inclus quellas sper la Clozza, süsom la Via da l'Ospidal) bastan tant pels paziants sco eir pels visitaduors. Pel persunal chi vain cul auto a lavur es da chattar ün'otra soluziun i'l cuntegn dal abitadi e na dadour la zona da fabrica.

Deponia Sotruinas

Il cussagl ha approvà il rapport d'üna firma specialisada e til deliberà per mans da l'Uffizi chantunal per natüra ed ambiain (ANU). Tenor quist rapport esa da survagliar la deponia eir in avegnir, i nu vuol però ingüna sanaziun. Il cussagl cumünal ha ideas co chi's pudess trar a nüz quist areal a lunga vista. Per gnir ün pass inavant in quista dumonda vuol el gnir

insembel culs respunsabels dals differents uffizis chantunals per discuter ils prossems pass.

Iglüminaziun Bügl Grond

Il cussagl ha deliberà ün credit posteriur da CHF 20'000.00 per l'iglüminaziun dal Bügl Grond intant realisada.

Società da fabrica Prasad-cher

Cunter l'intent da fabricar üna chasa cun plüssas abitaziuns sün parcella 2146 sun entradas posiziuns e recuors chi's drizzan cunter l'otezza dal stabilimaint previs. Quel correspuonda però plainamaing tant a la ledscha da fabrica sco eir al plan da quartier Prasad-cher I. Quistas basas legalas nu sun gnüdas contestadas pro l'approvaziun. Perquai ha decis il cussagl cumünal da refüsar il recuors e da dar il permiss da fabrica.

Zona per indigens Spinatscha

Il cussagl cumünal ha approvà il reglamaint chi cuntegna ils criteris per pudair s'acquistar terrain illa zona da fabrica per indigens in Spinatscha sco eir il sböz pels contrats da vendita. Il prossem pass es üna seguonda votumaziun cumünala. La cumünanza d'urna ha da decider davart il reglamaint e'ls contrats sco eir davart ün credit pella cumprita intermediara da las parcelas, cunquai cha our da motifs juridics e pratics nu vaja a splajar la vendita directamaing dal privat al privat.

Reglamaint da sunteri

La cumischiun da sunteri ha reelavrà il reglamaint da sunteri. Il cussagl ha approvà la nouva versiun.

Surdattas da lavuors

Chasa du Parc (sanaziun garaschas / lavuors vi dals locals pella scoula da musica)

- planisaziun e direcziun da fabrica pellas lavuors dal 2011: Roberto Pedrini, Scuol
- lavuors da mürader / fuonds: Marcus Wetzel, Scuol
- sanaziun dal tet / installaziuns sanitarias: Stecher SA, Scuol
- portas da metal: Jachen Bischoff, Scuol
- lavuors da falegnam / portas da lain: Spiller, Scuol
- installaziuns electricas: Electra Buin
- ventilaziun (pos. eventuala): Guido Christoffel, Scuol
- lavuors da pittur: Edgar Stocker, Scuol
- surtrattas da fuonds: Gisep Decoraziuns, Scuol

Via da Chantröven

- mür da sustegn: Marcus Wetzel, Scuol
- saiv da metal: Jachen Bischoff, Scuol

Sunteri

- lavuors da finischun e da surtratta: Palatini AG, Sent

PQ Rachögna

- preproget infrastructura: Caprez Indsch. SA, Scuol

Fuormaziun dal Stradun tanter @center ed hotel Astras:

- preproget / proget da fabrica: Andreas Egger, Trin / Daniel Wegmüller, Clostra

Via da Pradella (ost)

- surtratta: Rotomag, Sargans

Dumondas da fabrica

Il cussagl resp. la direcziun han dat ils seguaints permiss da fabrica:

- Architekten RLC AG, Rheineck: 4 chasas d'abitar (Schinnas, parc. 1065)
- Eugen + Zijke Canal: tet sur l'entrada (Manaröl, parc. 1906)
- Albert Mayer: Ingrondimaint d'ün'abitaziun e cellas solaras per prodüer aua choda (Pütvia, parc. 1236)
- Duri Roner: sbodamaint d'ün magazin (Sotchà, parc. 228)
- Marianne Sägesser: sbodamaint da la chasa existenta e fabricat nouv (Sotchà, parc. 256); in quist connex ha dat il cussagl ün dret per fabricar plü daspera a la parcellas 257 e 259 e decis da reglar cun ün servitut il dret da passagi per peduns sur la parcella 256 (senda d'Avant Muglins).
- Baumgartner Immo Scuol AG: local suotterran per seminars e suotpassagi Hotel Guardaval - Chasa Nova (parcellas 2162 / 2163 / 536 / 769)
- Arquint Immobilien AG: Isolaziun externa dal tet (Funtanatscha, parc. 399)
- Mario Defilla: 2 chasas dublas cun garascha (Ravagl, parc. 1239)
- Gisep Decoraziuns: Ingrondimaint local da lavur (Sotchà, parc. 222/1826)